

Uvažene exelencije, eminencije,

Poštovani Reisu-l-Ulema Husein Ef. Kavazović,

Dragi prijatelji, braćo i sestre,

Izuzetna mi je čast i zadovoljstvo što vas sve, u svoje, i u ime organizatora-produkcijskog tima „NAŠ FILM“ mogu pozdraviti i poselamiti, i zaželjeti Vam dobrodošlicu na premijeru filmske priče- video spota za kasidu „SHAM-DJECI SVIJETA“.

U septembru 2015. godine svijet je šokirala slika dječaka Ajlana Kurdija, koji je pronađen mrtav na obali mora. Upravo ta fotografija inspirisala je uvaženog gosp. Dževada Ibrahimovića da napiše poemu, radi koje smo se danas ovdje okupili. Kreativni tim koji je osjetio potrebu da komponuje muziku i aranžman, proživio je ove stihove na krajnje emotivan način, te je sve to rezultiralo kompozicijom u mekamu/melodiji Qurud koji u melodijskoj skali važi za mekam tuge.

Cilj projekta SHAM nije da publiku baci u tugu i očaj, već da preko emocije koja se budi kroz sinergiju riječi i tonova, senzibiliziramo ljude, da u njima probudimo osjećaj empatije i brige za drugoga, posebno za djecu.

Projekat SHAM je dio svjetske kampanje koja večeras počinje ovdje u Sarajevu. Ovo je priča o pravima djece, koju moćnici današnjeg Svijeta ugrožavaju. Ovu priču posvećujemo svoj ubijenoj djeci svijeta, od ubijene djece u logoru Aušvic, preko ubijene djece tokom genocida u Ruandi, ubijene djece u Siriji, Iraku, Libiji, Palestini, Jemenu, Bosni i Hercegovini.

Za nekoliko dana obilježit ćemo Dan sjećanja na 1.601 dijete ubijeno tokom opsade Sarajeva u periodu od '92. do '95.godine. Njima posebnu posvetu upućujemo. Neka naša poruka za večeras bude da pokušamo našim najmlađim, našoj djeci i omladini omogućiti zdrav ambijent u kojem će, slijedeći istinske vrijednosti postizati uspjeh na svakom životnom polju, te biti daleko od svakog zla, patnje, poroka i nesreće!

Koristim priliku da se zahvalim ljudima koji su ugradili sebe u ovu priču, gosp. Abdulkerim Popaja- muzički producent i aranžer, gosp. Mirza Redžepagić, saradnik na projektu, scenarista i režiser gosp. Sulejman Muratović. Zahvaljujem se produkciji kući „NAŠ FILM“ na čelu sa gosp. Hamzom Ražnatovićem koji su prepoznali moj ukupan dosadašnji rad i posebno ovaj projekat. Zahvalnost upućujem gosp. Emiru Zlataru, generalnom sekretaru Vijeća Kongresa bošnjačkih intelektualaca, bez kojeg ova promocija ne bi bila na ovom nivou. Partner večerašnje promocije je i Gazi Husrev begova biblioteka, te zahvalu upućujem gospodinu Osmanu Laviću i njegovim sardanicima.

Hvala uvaženim academicima prof.dr. Miletu Babiću i prof.dr. Esadu Durakoviću koji su pristali biti dijelom večerašnje priče i koji će nam se u nastavku obratiti. Na koncu veliko hvala uvaženom Reisu-l-ulemi Husein efendiji Kavazoviću, koji je pristao da bude visoki pokrovitelj ove premijere.

Hvala svim sponzorima ovog projekta, hvala svima vama dragi prijatelji i gosti koji ste svojim dolaskom podržali ovu priču.

Na kraju, ne mogu a da se ne zahvalim svojoj porodici, mojoj supruzi, koja je bila cijelo vrijeme iskrena podrška, bez koje ovaj projekat teško da bih iznio do kraja.

Želim vam da se ugodno osjećate u nastavku programa! Svako dobro!